



NESLUŽBENI PREČIŠĆENI TEKST
„Sl. novine BPK Goražde“, broj: 4/20 i 9/21)

Bosna i Hercegovina
Federacija Bosne i Hercegovine
Bosansko-podrinjski kanton Goražde
MINISTARSTVO ZA BORAČKA PITANJA

P R A V I L N I K
O USLOVIMA, NAČINU I KRITERIJIMA
ZA UTVRĐIVANJE PRIORITETA U DODJELI SREDSTAVA ZA POVRATAK I
ODRŽIVI POVRATAK

Goražde, juli 2021. godine

Na osnovu člana 56. i 66. Zakona o organizaciji organa uprave u Federaciji BiH („Sl. novine Federacije BiH“ broj: 35/05) i člana 159. stav 2. Zakona o dopunskim pravima branilaca i članova njihovih porodica u Bosansko-podrinjskom kantonu Goražde («Službene novine Bosansko-podrinjskog kantona Goražde» broj: 9/13, 11/14 i 15/19), Ministar za boračka pitanja Bosansko-podrinjskog kantona Goražde, uz saglasnost Vlade Bosansko-podrinjskog kantona Goražde, **d o n o s i:**

P R A V I L N I K
O USLOVIMA, NAČINU I KRITERIJIMA
ZA UTVRĐIVANJE PRIORITETA U DODJELI SREDSTAVA ZA POVRATAK I
ODRŽIVI POVRATAK

POGLAVLJE I-OPĆE ODREDBE

Član 1.
(Osnovne odredbe)

Ovim Pravilnikom definišu se korisnici prava, uređuje način i postupak ostvarivanja prava na dodjelu sredstava za povratak i održiv povratak, podnošenje zahtjeva, obavezna dokumentacija, uvjeti za ostvarivanje prava, kriteriji za određivanje visine sredstava prioriteta za ostvarivanje prava, način realizacije, finansiranje i ostvarivanje ovih prava.

Član 2.
(Korisnici prava)

Pravo na dodjelu sredstava za povratak i održiv povratak, mogu ostvariti lica iz člana 1. Zakona o dopunskim pravima branilaca i članova njihovih porodica (Službene novine Bosansko-podrinjskog kantona Goražde» broj: 9/13, 11/14 i 15/19) (u daljem tekstu: korisnici), koji su u prognaničkom, odnosno statusu izbjeglog i raseljenog lica na području Bosansko-podrinjskog kantona Goražde (u daljem tekstu: Kanton), prilikom njihovog povratka u prijeratna mjesta prebivališta.

Član 3.
(Objava javnog poziva)

Ministarstvo za boračka pitanja Bosansko-podrinjskog kantona Goražde (u daljem tekstu: Ministarstvo) za svaku godinu, a nakon usvajanja Budžeta Kantona objavljuje javni poziv za dodjelu sredstava za povratak i održiv povratak.

POGLAVLJE II-NAČIN, POSTUPAK I KRITERIJI ZA DODJELU SREDSTAVA ZA POVRATAK I ODRŽIV POVRATAK.

Član 4.
(Način podnošenja zahtjeva)

(1) Lica iz člana 2. ovog Pravilnika podnose zahtjev Ministarstvu na propisanom obrascu. U ovom obrascu navedena je i potrebna dokumentacija koju je podnosilac zahtjeva dužan priložiti uz isti.

(2) Podneseni zahtjev važi samo za budžetsku godinu u kojoj je podnijet.

(3) Zahtjev koji je primljen pismenim putem, a koji je nerazumljiv ili nepotpun, vratiće se podnosiocu zahtjeva radi dopune i preciziranja ili ako je to povoljnije za podnosioca zahtjeva, pozvat će se usmeno ili putem telefona obavijestiti o potrebi preciziranja i dopune zahtjeva i o istom napraviti službena zabilješka.

Član 5.

(Obavezna dokumentacija za ostvarivanje prava na dodjelu sredstava za povratak i održiv povratak)

(1) Uz zahtjev za odobravanje novčanih sredstava za povratak i održivi povratak prilažu se, u zavisnosti od namjene, sljedeći dokazi:

- a) uvjerenje odnosno potvrda o statusu branioca Bosne i Hercegovine,
- b) rješenje o utvrđenom statusu raseljenog lica,
- c) dokaz o neposjedovanju nekretnina ili stana na području Kantona,
- d) biznis plan (projekat) o obavljanju djelatnosti,
- e) uvjerenje o prebivalištu izdato od općine u koju se lice vratilo i
- f) predračun (ponuda) o traženim materijalnim sredstvima.

Član 6.

(Uslovi za ostvarivanje prava na dodjelu sredstava za povratak i održivi povratak)

(1) Lica iz člana 2. ovog Pravilnika i članovi njihovih porodica, koja imaju ili su imala status raseljenog lica, a pod uslovom da su prebivalište, odnosno boravište na području Kantona imala na dan potpisivanja „Općeg okvirnog sporazuma za mir u Bosni i Hercegovini,, (14.12.1995. godine) imaju pravo na jednokratnu bespovratnu dodjelu sredstava za povratak i održiv povratak u mjesto predratnog prebivališta.

(2) Lica koja su 1992. godine imala prebivalište na teritoriji entiteta Republika Srpska imat će prioritet na jednokratnu dodjelu bespovratnih sredstava za povratak i održiv povratak.

(3) Prava na jednokratnu bespovratnu dodjelu novčanih sredstava za povratak i održivi povratak ostvaruju lica pod uslovom da rješavaju stambene potrebe, pokreću proizvodno-uslužne djelatnosti, poljoprivredne i druge djelatnosti, a sve u cilju obezbjeđivanja uvjeta za povratak i održivi povratak.

(4) Korisnici prava po ovom Zakonu mogu biti lica iz člana 2. ovog Pravilnika, koja su u prognaničkom odnosno statusu izbjeglog i raseljenog lica i pored drugih uvjeta da im je omogućen nesmetan povratak u prijeratno prebivalište te da postoje uslovi za sanaciju postojećeg ili izgradnja novog stambenog objekta.

(5) Licima iz člana 2. ovog Pravilnika koja su u prognaničkom odnosno statusu izbjeglog i raseljenog lica ili su ostvarila povratak u prijeratna prebivališta, mogu se odobriti jednokratna bespovratna novčana sredstva za povratak i održiv povratak na osnovu podnesenog zahtjeva, ako ispunjavaju opće i posebne uslove propisane ovim Pravilnikom.

Član 7.

(Korisnici koji ne mogu ostvariti pravo)

Pravo iz člana 159. Zakona nemaju lica koja imaju ili su imala status interno raseljenih lica na području Kantona, a koja su svoje stambeno pitanje trajno riješila na području Kantona.

Član 8.

(Pojedinačna visina sredstava koja se može odobriti korisniku)

(1) Novčana sredstva za povratak i održivi povratak se mogu odobriti najviše u visini do 5.000 KM (slovima: pethiljada KM).

(2) Udruživanjem više lica iz člana 2. ovog Pravilnika kroz obavljanje određene djelatnosti iz člana 6. stav 3. ovog Pravilnika mogu se odobriti novčana sredstva u zavisnosti od broja lica, a najviše do iznosa koji predstavlja zbir pojedinačnih iznosa sredstava.

POGLAVLJE III-NAČIN I POSTUPAK OSTVARIVANJA PRAVA NA DODJELU SREDSTAVA ZA POVRATAK I ODRŽIV POVRATAK

Član 9.

(Komisija nadležna za odlučivanje)

(1) Postupak odobravanja novčanih sredstava za povratak i održivi povratak je sljedeći:

(2) Zahtjev za odobravanje novčanih sredstava, sa kompletnom propisanom dokumentacijom, podnosi se Ministarstvu po javnom oglašavanju;

(3) Komisija za dodjelu sredstava za povratak i održivi povratak imenovana rješenjem Ministra obrađuje sve pristigle zahtjeve i sa svojim mišljenjem o oporavdanosti zahtjeva dostavlja izvještaj sa prijedlogom korisnika za korištenje bespovratnih novčanih sredstava za povratak i održiv povratak Ministru;

(4) Ministar na prijedlog Komisije donosi konačnu Odluku o dodjeli sredstava, a Vlada na osnovu konačne Odluke Ministra donosi Odluku o odobravanju novčanih sredstava korisnicima sredstava za povratak i održivi povratak;

(5) Nakon donošenja Odluke, Ministarstvo zaključuje pojedinačne ugovore o dodjeli sredstava za povratak i održivi povratak sa licima kojima su odobrena novčana sredstva;

(6) Novčana sredstva za povratak i održiv povratak korisnik je dužan u cjelosti realizirati u roku od 90 dana nakon izvršene doznake novčanih sredstava, a u skladu sa sklopljenim pojedinačnim ugovorom o dodjeli sredstava za povratak i održiv povratak;

(7) Kontrolu realizacije ugovora o dodjeli sredstava za povratak i održivi povratak izvršava Ministarstvo, a po nalazu Komisije za utvrđivanje konkretne implementacije utrošenih sredstava na terenu.

Član 10.

(Odobravanje sredstava po nastupanju vanrednih okolnosti)

(1) Izuzetno, licima iz člana 2. ovog Pravilnika, koji iz opravdanih razloga (elementarne nepogode, vanredne okolnosti i sl.) ne mogu čekati Javna oglašavanja za programe ili projekte koje implementiraju drugi federalni ili kantonalni organi uprave nedležne za pitanja povratka, mogu se dodijeliti sredstva odmah nakon uvida u činjenično stanje na terenu, na osnovu ocjene opravdanosti zahtjeva, o čemu će komisija sačiniti službenu zabilješku.

(2) Odluku o dodjeli sredstava iz prethodnog stava donosi Vlada na prijedlog Ministra.

Član 11.
(Namjena dodjeljenih sredstava)

Novčana sredstva za povratak i održivi povratak se koriste za namjene iz člana 159. Zakona, a mogu se odobriti za sanaciju ili izgradnju stambenih objekata, nabavku osnovnih sredstava za obavljanje djelatnosti, građevinskog materijala, nabavku poljoprivrednih mašina ili alata, nabavku stoke i izvršenje određenih građevinskih usluga ili usluga popravke mašina.

POGLAVLJE IV- FINANSIRANJE

Član 12.

Sredstva za finansiranje prava utvrđenih ovim Pravilnikom za svaku godinu obezbjeđuju se iz Budžeta Ministarstva.

POGLAVLJE V- PRELAZNE I ZAVRŠNE ODREDBE

Član 13.

(Obaveza izmirenja nenamjenski utrošenih sredstava)

U slučaju nenamjenske realizacije dobijenih novčanih sredstava za povratak i održivi povratak na prijedlog Komisije, korisnik sredstava će biti u obavezi da u cjelosti izmiri sva sredstva u skladu sa ugovorom o dodjeli sredstava za povratak i održivi povratak.

Član 14.

(Prelazne odredbe)

Nadzor nad priznavanjem prava i odobravanjem sredstava po ovom Pravilniku vrši Ministarstvo.

Član 15.

(Način izmjena i dopuna)

Izmjene i dopune ovog Pravilnika se vrše na način i po postupku koji važi za njegovo donošenje.

Član 16.

(Tumačenje)

Tumačenje odredbi ovog Pravilnika daje Ministar.

Član 17.

(Primjena Zakona o opštem upravnom postupku)

Odredbe Zakona o upravnom postupku („Sl. novine FBiH“ broj: 2/98 i 48/99), primjenjuju se u svim pitanjima koja nisu uređena posebnim Zakonom i ovim Pravilnikom.

Član 18.
(Stupanje na snagu Pravilnika)

Ovaj Pravilnik stupa na snagu danom dobijanja saglasnosti od Vlade Bosansko-podrinjskog kantona Goražde, a naknadno će se objaviti u „Službenim novinama BPK Goražde“.

Broj: 11-11-519-2/20
Goražde, 16.03.2020.godine

MINISTAR

Edin Aganović

Na ovaj Pravilnik Vlada Bosansko-podrinjskog kantona Goražde dala je saglasnost svojim Odlukama broj: 03-11-483/20 od 12.03.2020.godine i broj: 03-11-1351/21 od 05.08.2021.godine.